

# Yisilajil Sul

Julursixl Zzirmar Arbosobo Ddei Xi Zi Jjixr Lol

**1** <sup>1</sup> Bosi goxrjia ddei zzirmar Julursixl zzirmar bei beil hal cir koxl, Yihexrhuaxr mel xiezi Yilixlmir leil sser dae a bbeix goxr ddar mel yarzi loxr lol niazzir a, yar dder Bosi goxrjia ddei zzirmar Julursixl leil sul vaexr zeil lol a, cirgoxr-lorbba leil bbeix gger lol a bbeix: <sup>2</sup> “Bosi zzirmar Julursixl eine bbeix: ‘Merlabbor hher dae Arbosobo Yihexrhuaxr mel, mer woxrke cirgoxr-hanga ngo leil gger ho a; yoxl ngo leil miardal a, Yoxrdaxl mermi Yiluxlsaler zzi gga yar leil xi zi gger lol. <sup>3</sup> Nia ca mel gga ha Yihexrhuaxr ddei cassorworsor mel dder Yoxrdaxl mermi Yiluxlsaler zzi gga ddeix a, Yirsaexllixl su ddei Arbosobo Yihexrhuaxr leil xi zi box gger ssi ddo. Arbosobo leil nia dax cirgo a hher dae lol nia. <sup>4</sup> Ha Yiluxlsaler zzi gga nr jjixr su ca mel, arddolmaex goxr dae zzorbbeixlei, piu, sae, zzaegu nei zzeir mel sser a, yaa dax cirgo a goxr dax dae Yiluxlsaler zzi gga jjixr niazzir su ca mel leil beijjiu nia, kebal halae, Yiluxlsaler zzi gga Arbosobo ddei xi zzir leil armael gger ggese mel gger nia.’”

<sup>5</sup> Yel, Yoxrdaxl cuxr nei Bixlyarmir cuxr ddei vaervaerpor, Arbosobo leil zi su nei Lixlweixl su ca hherdder Arbosobo yaa leil jjixr lol su ca maelmaerjjia lei bei har zaxr dae a, Yiluxlsaler zzi gga ddeix a, Yihexrhuaxr ddei xi zzir zi jjixr du a. <sup>6</sup> Yaa zaza-lili goxr dae ca mel dder piu bei teixl lei zzaegu, sae, zzaegu, zzeir, helvirsær naxrcixlcixl vei a yaa leil beijjiu, kebal halae armael gger ggese zzaegu mel gger. <sup>7</sup> Julursixl zzirmar lei Yihexrhuaxr ddei xi gga sser labox zzaegu mel vei teixl lei a; zzaegu eilmel mel, hal-leix Nixrbuxljiaxrnixrsar zzirmar Yiluxlsaler zzi gga su si lei a, armael zi dae bbex te ddei xi gga dol ji dae mel nga a. <sup>8</sup> Bosi goxrjia ddei zzirmar Julursixl zzaegu naxrcixlcixl dol ji ggie guaxr su Mirtixrlixldaxr leil miardal a, zzaegu eilmel vei teixl lei lol a, Yoxr-

daxl su ddei vaervaerpor Sexlbasar leil hhe gger lol. <sup>9</sup> Sser labox zzaegu mel hormo zza jiasibbor vaexr dae: sae paxrzi soceimo (30), piu paxrzi cirdumo (1,000), altor nrzeige (28) baxr, <sup>10</sup> sae baxlaxr socei (30) peixl, hormosael naxr-nr-cixl piu baxlaxr lixiucei (410) peixl nei kebal sser labox zzaegu cirdu (1,000) jji. <sup>11</sup> Sae baxlaxr, piu baxlaxr nei kebal sser labox zzaegu maelmaerjjia a ngordu lixiu (5,400) jji zza. Ssu si ca mel Babirluixr goxrjia cirdae a Yiluxlsaler zzi gga ddeix car, Sexlbasar eilmel maelmaerjjia lei vei deix dax lei a.

### Ssu Si A Jjixr Lei Su Ca Mel Ddei Mi

**2** <sup>1</sup> Babirluixr goxrjia ddei zzirmar Nixrbuxljiaxrnixrsar mel hal-leix Yoxrdaxl mermi su ca mel leil Babirluixr goxrjia gga ssu mal si a. Nael eilcar yaa ddei giedae ca mel, yaa leil ssu mal si mermi ddei gga cirdae a, Yiluxlsaler zzi gga nei Yoxrdaxl mermi armael ddei zzi gga jjixr lei a. <sup>2</sup> Yaa mel Sorloxbaboxr, Yisuyal, Nixrximir, Xilaexryar, Lixllaexryar, Moxldirgier, Bixlsa, Mirsibaxr, Birgexrwaryi, Lixlhoxr nei Banaxr dax cirgo a jjixr lei.

<sup>3</sup> Yirsaexllixl su ca mel hormoler zza jiasibbor vaexr deix dae: Baluxl ddei giedae ca nrdu cirxiu sircei nnel (2,172); <sup>4</sup> Sixlfaxrtixryar ddei giedae ca soxiu sircei nnel (372); <sup>5</sup> Yalla ddei giedae ca sirxiu sircei ngorler (775); <sup>6</sup> Bahamoxrya ddei giedae ca, hherdder Yisuyal nei Yueya ddei giedae ca nrdu heixlxu ceinirmo (2,812); <sup>7</sup> Yirlaxr ddei giedae ca cirdu nrxiu ngorcei liller (1,254); <sup>8</sup> Sartur ddei giedae ca gexiu licei ngorler (945); <sup>9</sup> Saxlgaer ddei giedae ca sirxiu qiuxlceimo (760); <sup>10</sup> Banixr ddei giedae ca qiuxlxu licei nnel (642); <sup>11</sup> Birbaexl ddei giedae ca qiuxlxu nrzei soler (623); <sup>12</sup> Yajiaxr ddei giedae ca cirdu nrxiu nrzei nnel (1,222); <sup>13</sup> Yaxldonixrga ddei giedae ca qiuxlxu qiuxlcei qiuxller (666); <sup>14</sup> Birgexrwaryi ddei giedae ca nrdu ngorcei qiuxller (2,056); <sup>15</sup> Yaldi ddei giedae ca lixiu ngorcei liller (454); <sup>16</sup> Yaltexl ddei giedae ca, hherdder Xixijia ddei giedae ca gecei heixller (98); <sup>17</sup> Birsaexl ddei giedae ca soxiu nrzei soler (323); <sup>18</sup> Yuela ddei giedae ca cirxiu ceinirmo (112); <sup>19</sup> Hasuixl ddei giedae ca nrxiu nrzei soler (223); <sup>20</sup> Jixrbaxl'er su

ca gecei ngorler (95); <sup>21</sup> Boxrlxlhexr su ca cirxiu nrzei soler (123); <sup>22</sup> Nixrtoxrfafr su ca ngorcei qiuxller (56); <sup>23</sup> Yaxlnaxrtu su ca cirxiu nrzei heixller (128); <sup>24</sup> Yalsimarfufr su ca licei nnel (42); <sup>25</sup> Zilixlylixr su ca, Zifeila su ca nei Birluxl su ca maelmaer a sirxiu licei soler (743); <sup>26</sup> Lamar su ca nei Jiaba su ca maelmaer a qiuxlxixu nrzei cirdder (621); <sup>27</sup> Moxlmar su ca cirxiu nrzei nnel (122); <sup>28</sup> Boxrtexllixl su ca nei Aexl su ca maelmaer a nrxiu nrzei soler (223); <sup>29</sup> Nixrbo su ca ngorcei nnel (52); <sup>30</sup> Moxlbixl su ca cirxiu ngorcei qiuxller (156); <sup>31</sup> kebal Yirlaxr ddei giedae ca cirdu nrxiu ngorcei liller (1,254); <sup>32</sup> Halixr ddei giedae ca soxiu nrzeimo (320); <sup>33</sup> Loxrdaexr su ca, Hadixl su ca nei Anoxr su ca maelmaer a sirxiu nrzei ngorler (725); <sup>34</sup> Yilixlge su ca soxiu licei ngorler (345); <sup>35</sup> Xinaxr su ca sodu qiuxlxixu soceimo (3,630).

<sup>36</sup> Arbosobo leil zi su Yisuyal hhexr ca Yidaxlyar ddei giedae ca gexiu sircei soler (973); <sup>37</sup> Yimaexl ddei giedae ca cirdu ngorcei nnel (1,052); <sup>38</sup> Basihuxl'aer ddei giedae ca cirdu nrxiu licei sirler (1,247); <sup>39</sup> Halixr ddei giedae ca cirdu ceisirmo (1,017).

<sup>40</sup> Lixlweixl su ca Hexrdaxrweiyar ddei giedae ca, hherdder Yisuyal nei Jiaxrmixl ddei giedae ca sircei liller (74); <sup>41</sup> caxlgo caxl su Yalsaxl ddei giedae ca cirxiu nrzei hiexller (128); <sup>42</sup> alddur su su: Sarloxr ddei giedae ca, Yaltexl ddei giedae ca, Daxrme ddei giedae ca, Yalgur ddei giedae ca, Hadirdaxl ddei giedae ca nei Soxlbaexl ddei giedae ca maelmaer a cirxiu socei geler (139).

<sup>43</sup> Arbosobo ddei xi gga miar bei su ca, hherdder: Xiha ddei giedae ca, Hasuba ddei giedae ca, Daxrba'er ddei giedae ca, <sup>44</sup> Ziluxl ddei giedae ca, Xiyal ddei giedae ca, Baduixl ddei giedae ca, <sup>45</sup> Lixlbanaxr ddei giedae ca, Hajiaba ddei giedae ca, Yalgur ddei giedae ca, <sup>46</sup> Hajiaxr ddei giedae ca, Saxlmaer ddei giedae ca, Hanaxr ddei giedae ca, <sup>47</sup> Zixrdaexr ddei giedae ca, Jiaha ddei giedae ca, Lixlyalyar ddei giedae ca, <sup>48</sup> Lixlxuxl ddei giedae ca, Nixrgedaxl ddei giedae ca, Jiasaxl ddei giedae ca, <sup>49</sup> Wusar ddei giedae ca, Baxiyal ddei giedae ca, Birsaxl ddei giedae ca, <sup>50</sup> Yanaxr ddei giedae ca, Mirwunixr ddei giedae ca, Nixrpurxi ddei giedae ca, <sup>51</sup> Bapur ddei giedae ca, Hagurba ddei giedae ca, Hafu ddei giedae ca, <sup>52</sup> Baxir-

lixl ddei giedae ca, Mirxidaxl ddei giedae ca, Hasa ddei giedae ca, <sup>53</sup> Bake ddei giedae ca, Xixila ddei giedae ca, Daxrmar ddei giedae ca, <sup>54</sup> Nixrxixlyal ddei giedae ca, Hatixrfaxr ddei giedae ca mel nga a.

<sup>55</sup> Sorloxrmexr leil visser su ca mel ddei giedae ca mel, hherdder: Sortaexl ddei giedae ca, Sorfeilixl ddei giedae ca, Birluxldaxl ddei giedae ca, <sup>56</sup> Yarla ddei giedae ca, Daxrkui ddei giedae ca, Zixrdaexr ddei giedae ca, <sup>57</sup> Sixlfaxrtixryar ddei giedae ca, Hatixl ddei giedae ca, Bohielixlhasibayi ddei giedae ca, Yalmir ddei giedae ca mel nga a.

<sup>58</sup> Arbosobo ddei xi gga miar bei su ca mel nei Sorloxrmexr leil visser su ca mel ddei giedae ca mel maelmaer a soxiu gecei nnel (392) zza.

<sup>59</sup> Texlmirla, Texlhasar, Zilixl, Yadaxl nei Yimaexl mermi ddeix lei su ca mel, yaa ddei cuxr nei yaa ddei porpor mel Yirsaexllixl su ca nga nga yaa nr saexl, yel ca mel leil saexl lol nr cexr. <sup>60</sup> Yaa mel dder: Dixllaexryar ddei giedae ca, Dobiryar ddei giedae ca, Nixr-gedaxl ddei giedae ca mel nga a; maelmaer a qiuxlxixu ngorcei nnel (652) zza. <sup>61</sup> Arbosobo leil zi su mel gga, Habayar ddei giedae ca, Hagesi ddei giedae ca, Baxilaexr ddei giedae ca mel, yaa ddei porpor mel mel Zilixl su ca Baxilaexr ddei ssormaer leil bbeix a maerssor bei lol, yel Baxilaexr mi. <sup>62</sup> Eil so hhexr ddei ca mel, cuxr mel gga armael ddei cuxr leil zo, nael zo wo nr xie, yel dder sei-nr-beix suax, Arbosobo leil zi su nr bei lol. <sup>63</sup> Serzar ddei yaa leil bbeix: “Bbe teixl lei a Arbosobo ddei loxr zzor ddu mel zzor nr ddo, wulixr nei turmixr sser a arsae lerler nga bbeix teixl lei xie Arbosobo leil zi su ca zza hane zzezze ci.” <sup>64</sup> Ca maelmaerjjia a limeir nrdu soxiu qiuxlceimo (42,360) zza. <sup>65</sup> Eilmel leil cuxrteixl a, halae yaa ddei zebol sirdu soxiu socei sirlar (7,337) zza, yoxl caxlgo caxl su capor ssormaer maelmaer a nrxiuler (200) zza. <sup>66</sup> Yaa mur sirxiu socei qiuxller (736) zza, lozi nrxiu licei ngorler (245) zza, <sup>67</sup> loxl-toxr lixiu socei ngorler (435) zza, tarlodaex qiuxldu sirxiu nrzeimo (6,720) zza.

<sup>68</sup> Vaerverpor ar mel a Yiluxlsaler zzi gga Yihexrhuaxr ddei xi zzir zi goxr ggie ddeix ci a dder ggesese a zzaegu ho a xi zi box. <sup>69</sup> Yaa armael ddei wor mel dax zox dae a, miar eil ddei leil weix a, sae ngorxiu (500) zi, piu nrdu heixlxiu (2,800) zi nei Arbosobo leil zi su ca mel veixr labox pia cirxiu (100) xiux gger.

<sup>70</sup> Yel Arbosobo leil zi su, Lixlweixl su ca, cassor-worssor mel gga ca ar mel, caxlgo caxl su, alddur su su nei Arbosobo ddei xi gga miar bei su mel armael ddei zzi gga goxr dae a; kebal Yirsaexllixl su ca mel lei armael ddei zzi gga goxr dae a.

### Arbosobo Leil Zi Nixixl Halmel Goxr Xixl Box

**3** <sup>1</sup> Sirxiu gga ci a, Yirsaexllixl su ca mel armael ddei zzi gga goxr dae a; yaa maelmaerjgia nixmox zzar ciryoxxr a xiar dae a, Yiluxlsaler zzi gga hher pex du lei a. <sup>2</sup> Yuesaxldaxr ddei ssor Yisuyal nei yar ddei arzzi-nimar Arbosobo leil zi su maelmaerjgia, halae Sarlatixr ddei ssor Sorloxxrbaboxr nei yar ddei arzzi-nimar mel, cirgo a Yirsaexllixl su ddei Arbosobo leil zzeir seixlziggie ddei zi box a, Arbosobo ddei ca Moxrxi Lixlfaxr sul leil vaexr deix dae mel dax zox dae a, zzeir seixlziggie ddei leil adoxl gga cu a zi labox mel zi niazzir. <sup>3</sup> Yaa halmaex gga goxr dae su ca mel leil gexr bbeixarnar, halae Arbosobo leil zzeir seixlziggie ddei halleix bei goxr ggie halmaex bei box a, eilneixr-nehe nei eilmerxixl, adoxl gga cu a ziddu mel Yihexrhuaxr leil zi. <sup>4</sup> Yaa lixfaxr sul leil vaexr deix dae mel dax zox dae a Zuxlpoxrjiax goxr, cirni-cirni lei dixl dae mel dax zox dae a, adoxl gga cu a ziddu mel zi. <sup>5</sup> Eilmel leil cuxrteixl a, yaa halae zoxlzoxl a adoxl gga cu a zi dae mel zi, halae ddeixteixl cir ni nei Yihexrhuaxr dixl dae jiax hazza gga ziddu mel zi, yoxl Yihexrhuaxr leil armael zi niazzir dae mel zi. <sup>6</sup> Yihexrhuaxr ddei xi zzir sixrjiuxr ddei xiax nr teixl seir bbeixarnar, Sirxiu ddeixteixl cir ni cirdae a, yaa dder Yihexrhuaxr leil adoxl gga cu a ziddu mel zi. <sup>7</sup> Yaa yoxl loxjiuxr nei mojiuxr mel leil worpe gger, loxlmoxr, zzibbaer nei ssuvi mel Xiduixl su ca nei Tuiloxr su ca mel leil gger a, yaa leil xiabaexr zzei mel Lixrbanexl mermi cirdae a neixvi dax ba mal a, neixvi gga

bu a, Yuepaxl zzi gga bu mal lol, eilmel mel Bosi goxrjia ddei zzirmar Julursixl ddarkoxl goxr mel dax zox dae.

### Arbosobo Ddei Xi Zzir Zi Box

<sup>8</sup> Cassor-worssor mel Yiluxlsaler zzi gga Arbosobo ddei xi zzir zi goxr ggie ddeix ci a. Giedae cir koxl Bbexsirxiu gga, Sarlatixr ddei ssor Sorloxr baboxr, Yuesaxldaxr ddei ssor Yisuyal nei kebal arzzinimar: hherdder Arbosobo leil zi su mel, Lixlweixl su ca mel nei ssu si a yoxl Yiluxlsaler jjixr lei su ca hazza ssi a, Arbosobo ddei xi zzir zi; yoxl nrzei koxl leil ddeix su Lixlweixl su ca mel leil miardal a, Yihexrhuaxr ddei xi zzir zi miar eilmel leil guaxr lol. <sup>9</sup> Yel Yoxrdaxl giedae ca, hherdder: Yisuyal nei yar ddei ssor mel, halae yar ddei cirssor mel, Jiaxrmiexl nei yar ddei ssor mel, Lixlweixl su ca Xinaxrdaxr ddei ssor mel, halae yar ddei cirssor mel, maelmaerjjia lei cirter a lei a, Arbosobo ddei xi gga miar bei su ca mel leil guaxr. <sup>10</sup> Sixrjiuxr xiax su ca mel Yihexrhuaxr ddei xi zzir ddei sixrjiuxr xiax car, Arbosobo leil zi su ca mel dder Arbosobo leil zi a veixr labox pia tox veixr dae a baerlae mex, Lixlweixl su ca Yalsaxl ddei ssor mel lei biulbiulcar deil, maelmaerjjia lei Yirsaexllixl su ddei zzirmar Daxlweixl miardal dae mel dax zox dae a, Yihexrhuaxr leil bbeix zae gger. <sup>11</sup> Yaa zzicarzzi dax cirter a caxlgo caxl a, Yihexrhuaxr leil bbeix zae gger, caxl zae gger a bbeix: “Yar mel halleix tortor dder seir, yar Yirsaexllixl su ca mel leil arddolcar ci a lei perniar,” eine bbeix. Yihexrhuaxr ddei xi zzir ddei sixrjiuxr ddei mel xiax du lei ho a, yel yaa Yihexrhuaxr leil bbeix zae gger car, cassor-worssor mel worcixl-worni ae dae. <sup>12</sup> Nael Arbosobo leil zi su mel, Lixlweixl su ca mel nei ake hhexr ddei oldde mel<sup>a</sup>, hherdder halleix Arbosobo ddei xi zzir leil mia goxr su camar mel, eilcar Arbosobo ddei xi eil zzir ddei sixrjiuxr xiax ggie mia a dder, worcixl-worni ae nge du lei a; ca cirke a lei ggegge-sese a worcixl-worni ae dae. <sup>13</sup> Ca mel worcixl-worni ae dae a, qiurbbi mel vimirmir ggie lei bbejjiur ddo.

---

<sup>a</sup>3:12 ake hhexr ddei oldde mel Yirsaexllixl goxrjia gga mel, ake hhexr ddei oldde ddei mel dder capor ddei nga a.

Yel cassor-worssor mel lei ae dae qiurbbi bbeixsael nge dae qiurbbi bbe teixl lei nr xie.

### Arbosobo Ddei Xi Zzir Leil Zi Box Nr Cexr Lol

**4**<sup>1</sup> Yoxrdaxl su ca mel leil nei Bixlyarmir su ca mel leil dir su ca mel, ssu si a yoxl jjixr lei su ca mel Yirsaexllixl su ca mel ddei Arbosobo Yihexrhuaxr leil xi zzir zi box gger bbejjiur a dder, <sup>2</sup> Sorloxbaboxr nei Yirsaexllixl su ake hhexr ddei oldde mel leil i ssi a, yaa leil bbeix: “Ngua lei nia sael a nia ddei Arbosobo leil qiuxr. Yal-suxl zzirmar Yirsarhaduixl ngua leil eilmaex gga hier deix ci cirdae a, ngua dder yilzi a Arbosobo leil zi. Yel, ngua leil nia dax cirgo a Yihexrhuaxr ddei xi zzir leil zi dax lol la.” <sup>3</sup> Nael Sorloxbaboxr, Yisuyal nei kebal Yirsaexllixl su ake hhexr ddei oldde mel yaa leil ddarkoxl a bbeix: “Nia ngua ddei Arbosobo ddei xi zzir leil zi dax nr ddo. Bosi goxrjia ddei zzirmar Julursixl miardal dae mel dax zox dae a, ngua armael Yirsaexllixl su ddei Arbosobo Yihexrhuaxr leil xi zzir zi gger nia,” eine bbeix. <sup>4</sup> Yel, halmaex gga goxr dae ca mel dder Yoxrdaxl su ca mel leil nixmox bbiex lol, yaa leil zux a, zi nr cexr lol. <sup>5</sup> Bosi goxrjia ddei zzirmar Julursixl zzirmar bei cirdae a, Bosi goxrjia ddei zzirmar Daxlliuxrsixl zzirmar bei zzezze lei, ca hal mel vaervaerpor bei su mel leil zzirbae ho a, yaa xiar dae mel leil bei bei nr cexr lol niazzir.

### Bosi Zzirmar Miardal A, Yiluxlsaler Zzi Ddei Zi Nor Lol

<sup>6</sup> Yalhasuirlur zzirmar bei beil car, Yoxrdaxl su ca nei Yiluxlsaler su ca mel leil dir su ca mel goxl labox sul vaexr a yaa leil goxl ssi.

<sup>7</sup> Yaldaxrxuxi zzirmar bei dae car a, Birsilaxr, Mirtexllixldaxr, Tabiexr nei yaa dax cirgo a vaervaerpor bei su mel goxl labox xil vaexr a, Bosi goxrjia ddei zzirmar Yaldaxrxuxi leil gger. Xil eil fo mel Yal-laxr ddar sser a vaexr, zza car saelnei Bosi ddar sser a zza. <sup>8</sup> Serzar Lixlhoxr nei sersuzixl Seswaexl lei Yiluxlsaler su ca mel leil goxl niazzir a, goxl labox xil vaexr a, Yaldaxrxuxi zzirmar leil gger a. <sup>9</sup> Serzar Lixlhoxr, sersuzixl Seswaexl nei yaa dax cirgo a vaervaerpor bei su Dirnaxr su ca, Yalfaxrsartixrjia su ca, Tapirla su ca, Yalfaxrsar

su ca, Yalziweixl su ca, Babirluixr su ca, Susajia su ca, Dirhaexl su ca, Yirlaxr su ca, <sup>10</sup> halae bbesur zzazzamo, iduddoddomo Yalsinaxlba kebal mermi ba si lei lol a, Sarmarlixlyal mermi zzi mel gga nei Hexrxi ser gga hher dae lol ca mel, <sup>11</sup> yar leil xil vaexr gger a bbeix: “Yaldaxrxuxi zzirmar, Hexrxi ser gga hher dae ni leil visser su ca mel ni leil xil vaexr gger. <sup>12</sup> Zzirmar, ni saexl piar a; zzirmar ni dax halmaex cirdae a ngua dax eilmaex ddeix ci Yoxrdaxl su ca mel, Yiluxlsaler zzi gga ssi ci a, ddarvu nr no yarzi gexrddo bei goxr zzi eil zzir zi box, sixrjiuxr xiax a, weixrqiaxr bei box dae a. <sup>13</sup> Eilcar, zzirmar ni saexl nia, yaa zzi eil zzir zi box teixl, weixrqiaxr ddei bei teixl arddeirnga a, yaa dder ni leil zeixleixr zzaegu ho nr var, loxlmoxr sax gger nr var, suix sax gger nr var a; yel zzirmar suix se wo mel dder nganiul var. <sup>14</sup> Ngua mel zzirmar leil miar bei gger su a, ngua zzirmar cixrkui ggie mia nia-nr-zzir; yel ngua dder zzirmar leil xil vaexr gger. <sup>15</sup> Zzirmar, ni leil qie, ni ca leil miardal a halleix zzirmar vaexr ze lei mel leil arleixr i. Eine nga a, ni dder saexl a: zzi eil zzir mel yilzi a lei ddar nr no; halleix cirdae a, yilzi a zzirmar cirddei-hanga leil nei cirser-hanga ddei vaervaerpor mel leil ke. Zzi eil zzir gga goxr dae ca mel leil yilzi a yarzi guaxr sol. Yel zzi eil zzir leil dder caexr xiax gger a. <sup>16</sup> Zzirmar, ngua ni leil saexl lol niazzir, zzi eil zzir zi box du lei, zzi ddei weixrqiaxr mel bei teixl arddeirnga a, Hexrxi ser ddei dder zeixleixr ni ddei nr nga a,” eine bbeix a.

<sup>17</sup> Zzirmar ddei serzar Lixlhoxr, sersuzixl Sesuaixl, halae yaa dax cirgo a vaervaerpor bei su, hherdder Sarmarlixlyal nei Hexrxi ser gga goxr dae ca mel leil xil vaexr xixl gger a bbeix: “Nia leil zza-so lol nia! <sup>18</sup> Nia ngo leil vaexr gger xil mel, ca mel Bosi ddar sser a ngo leil zza gger ho a. <sup>19</sup> Yel ngo miardal ze a ca mel leil caxr lol a, Yiluxlsaler zzi ddei halleix tortor dder zzirmar mel ddei ddar nr no, zoxlzoxl a zzirmar leil dir, yarzi guaxr sol saexl a. <sup>20</sup> Halleix bbesur zzazza mo zzirmar mel Yiluxlsaler nei Hexrxi ser ddei leil guaxr goxr a; halae ca mel leil zzaegu ho lol nei ciryoxr-hanga suix sax lol. <sup>21</sup> Eilcar, nia sul vaexr a, ca eilmel leil miardal a bei nor lol a, zzi eil zzir leil zi nr cexr lol a, ngo zeixleixr miardal ze lei zzezze ci. <sup>22</sup> Nia zabbar-seilseir a bei nia, dawo nr ddo. Arsaenga a zzir-



mar leil ke dae mel miur dax lol a, zzirmar leil suirsixr lol leir?” eine bbeix a.

<sup>23</sup> Yaldaxrxuxi zzirmar vaexr dae mel serzar Lixlhoxr nei sersuzixl Sesuaixl, halae yaa dax cirgo a vaervaerpor bei su mel meixsaer qir leil zza a, yaa dder nialngasael Yiluxlsaler zzi ddei gga ssi a Yoxrdaxl su ca mel leil i ssi, meixr daxlgaxl-daxllixl ar cir hier dae a, ddoddo nr ddo yaa leil bei nor lol.

### Arbosobo Ddei Xi Zzir Zeixleixr Zi Box

<sup>24</sup> Yel, Yiluxlsaler zzi ddei gga Arbosobo ddei xi zzir dder zi nor dae a, Daxlliuxrsixl Bosi goxrjia ddei zzirmar bei nr koxl zzezze ci a.

**5** <sup>1</sup> Halcar, xiezi Hagai nei Yixldo ddei ssor Sarjialixlyal Yirsaexl-lixl su ddei Arbosobo ddei mi ddei sser dae a, Yoxrdaxl mer-mi nei Yiluxlsaler zzi gga hher dae Yoxrdaxl su ca mel leil Arbosobo ddei ddar mel biar gger. <sup>2</sup> Yel Sarlatixr ddei ssor Sorloxr baboxr nei Yuesaxldaxr ddei ssor Yisuyal yaa Yiluxlsaler zzi gga Arbosobo ddei xi zzir zi box a, Arbosobo ddei xiezi hal nnel yaa dax hher dax dae a, yaa leil beijjiu.

<sup>3</sup> Halcar, Hexrxi ser serzar Daxrnaer, Sixlta-Bosinaer, halae yaa dax cir piar a vaervaerpor bei su mel yaa dax lei a, biex a bbeix: “Arseir nia leil miardal a Arbosobo ddei xi zzir zi box lol, lu eilmel ggu box lol a leir?” eine biex a. <sup>4</sup> Yaa yoxl Arbosobo ddei xi zzir zi su ca maelmaerjjia ddei mi mel li si a. <sup>5</sup> Nael Arbosobo Yoxrdaxl su leil guaxr su camar mel leil guaxr dae a, yaa leil nor ze lei nia bbeix su ca lei ar ddei nr zza, miar eil jji Daxlliuxrsixl zzirmar leil biex a, yar yaa leil ddarkoxl hane zzezze ci.

<sup>6</sup> Hexrxi ser ddei serzar Daxrnaer nei Sixlta-Bosinaer, halae yaa dax cir piar a vaervaerpor bei su mel, xil vaexr a Daxlliuxrsixl zzirmar dax goxl. <sup>7</sup> Xil leil vaexr dae a bbeix: “Daxlliuxrsixl zzirmar leil cirza-hanga lei zzaso lol nia! <sup>8</sup> Zzirmar, ngua ni leil bbeix gger nia. Ngua Yoxrdaxl ser gga ssi a, vaer zzir Arbosobo ddei xi zzir zi box ggie mia a. Xi eil zzir mel legelbbe vaervaer mel sser a zi, halae sseigu mel lu mel gga hha ji dae. Miar eil ddei yarzi bei yoxryixl;

yaa leixrga gga yarzi bei seir. <sup>9</sup> Ngua dder ca leil guaxr su camar hal mel leil biex a bbeix: ‘Arseir nia leil miardal a Arbosobo ddei xi eil zzir zi box lol, lu eilmel ggu box lol a leir?’ eine bbeix. <sup>10</sup> Ngua yoxl yaa ddei mi mel leil biex, yaa leil guaxr su ca mel ddei mi mel vaexr ze lei a, zzirmar ni leil bbeix gger. <sup>11</sup> Yaa ddarkoxl a bbeix: ‘Ngua mel merlo-milo ddei Arbosobo leil visser su ca a. Ngua hormo koxl xilmeir leil dder zi Arbosobo ddei xi zzir zi box, hherdder Yirsaexllixl su ddei yarzi bbesur zza zzirmar ar ddei a zi du lei zzir nga a. <sup>12</sup> Nael ngua ddei porpor mel merhhexr gga hher dae Arbosobo leil seifu de faex gger a, Arbosobo yaa leil Jialexldir su ca Babirluixr goxjia ddei zzirmar Nixrbuxljiaxrnixrsar leixrga gga jia ji gger a. Yar dder Arbosobo ddei xi eil zzir leil bei xiaxr gger, yoxl cassor-worssor mel leil Babirluixr goxrjia gga ssu mal si. <sup>13</sup> Nael, Babirluixr goxrjia ddei zzirmar Julursixl zzirmar bei beil cir koxl, yar miardal ze lei a Arbosobo ddei xi eil zzir zi box lol. <sup>14</sup> Nixrbuxljiaxrnixrsar zzirmar halleix Yiluxlsaler zzi gga lei a, Arbosobo ddei xi gga su si lei piu sae bei teixl lei zzaegu mel Babirluixr goxrjia neir xi gga dol ji dae. Nael Saexllursixl zzirmar Babirluixr goxrjia neir xi gga zzaegu eilmel vei teixl lei a, yar Yoxrtaexl su ca ddei serzar bei lol Saexlbasaxl leil jia gger. <sup>15</sup> Halae yar leil miardal a, zzaegu eilmel vei si a, Yiluxlsaler zzi gga Arbosobo ddei xi gga dol ji xixl lol, Arbosobo ddei xi zzir halleix zi goxr ggie zi box xixl lol. <sup>16</sup> Yel, Sexlbasaxl jjixr lei a, Yiluxlsaler zzi gga Arbosobo ddei xi zzir ddei sixrjiuxr xiax du lei a. Miar eil ddei halcar cirdae a, eilleix zzeze lei bei doxr dae; nael halae bei nr jjia seir.’ <sup>17</sup> Eilcar, zzirmar ni zzir-dae a seir arddeirnga a, ni leil qie, Babirluixr zzirmar goxr gel lei ho mel vaexr deix dae sul mel dol ggie arleixr i a, Julursixl zzirmar Yiluxlsaler zzi gga Arbosobo ddei xi zzir leil zi box lol miardaldal a bbe arleixr i. Zzirmar nixmox zzar arsae xiar dae mel, miardal ze lei a ngua leil saexl lol la,” eine bbeix a.

Halleix Julursixl Zzirmar Miardal Goxr Mel Leil Mia A

**6** <sup>1</sup> Yel Daxlliuxrsixl zzirmar miardal ze lei a, Babirluixr goxrjia ddei zzirmar goxr gel lei ho mel vaexr deix dae sul mel dol ggie

arleixr i lol. <sup>2</sup> Mardaexl ser Yalmarta zzi ddei gga zzirmar hher ggie xi gga sul ar jur zo wo a; sul jur leil vaexr dae a bbeix: <sup>3</sup> Julursixl zzirmar bei beil koxl, yar miardal a, Yiluxlsaler zzi gga Arbosobo ddei xi zzir zi box lol; Arbosobo leil zi ggie bei lol; Arbosobo ddei xi zzir ddei sixrjiuxr xi ax lol. Arbosobo ddei xi zzir muggiebbæer nael, nrzei sir gocixr zza nia; kuaxggiebbæer lei nrzei sir gocixr zza nia. <sup>4</sup> Lu mel nael legelbbe vaervaer mel so cexr, ggaxrsibbor sseigu ar cexr nga nia. Zzirbae mel nael, zzirmar zzirbae ji ggie vei teixl lei a ddux. <sup>5</sup> Halae Babirluixr zzirmar Yiluxlsaler zzi gga Arbosobo ddei xi gga su si lei a, Babiluixr goxrjia vei mal lei piu sae bei teixl lei zzaegu mel lei, Yiluxlsaler zzi gga Arbosobo ddei xi gga koxl xixl gger a, halleix dol ggie dol xixl nia,” eine bbeix a.

Daxlliuxrsixl Zzirmar Miardal A, Arbosobo  
Ddei Xi Zzir Zi Box Zei Si Lol

<sup>6</sup> Yel Daxlliuxrsixl zzirmar miardal a bbeix: “Eilcar Hexrxi ser ddei serzar Daxrnaer nei Sixlta-Bosinaer, halae nia dax cir piar a bei su Hexrxi ser ddei vaervaerpor mel, nia Arbosobo ddei xi zzir dax vimirmir sael hher nia. <sup>7</sup> Arbosobo ddei xi zzir zi box a, nia bbiur gex dae nr ddo. Yoxrdaxl su ca mel ddei serzar nei Yoxrdaxl su ca mel leil guaxr su camar mel leil halleix zi goxr ggie, Arbosobo ddei xi zzir zi box lol nia. <sup>8</sup> Kebal ngo yoxl sul vaexr a, nia leil miardal, nia Yoxrdaxl su ca leil guaxr su camar mel leil beijjiu a, Arbosobo ddei xi zzir zi nia. Nialngasael Hexrxi ser zzirmar suix se si lei zzirbae mel vei si lei a, Arbosobo ddei xi zi nia. Nrnga a, miar ddei dawo dae leilei. <sup>9</sup> Yaa merlabbor Arbosobo leil adoxl gga cu a ziddu mel zi a sser zoxr: loxrbbexssor, yabol, yassor, so, cor, puxrto zzibbaer nei saercor ssuvi mel Yiluxlsalexr zzi gga Arbosobo leil zi su ca mel bbeix dae mel dax zox dae a, bbecir-bbeni yaa leil gger nia, bei cox lol nr ddo. <sup>10</sup> Yel yaa leil nerxiuxiumo ziddu mel merlabbor hher dae Arbosobo leil zi cexr lol. Yoxl zzirmar nei zzirmar ddei ssor mel leil olga si qiuxr gger lol. <sup>11</sup> Ngo zeixleixr nia leil miardal, ngo miardal dae eil ddei leil gierbox gger su ca zza arddeirnga a, arsae bei lei yar ddei xi gga sseigu ar taex caexr teixl lei a, yar leil sseigu taex

leil gaxl du lei a, bei zil gger nia; yar ddei xi mel lei cirbelde sael a ar be loxr lol nia. <sup>12</sup> Zzirmar bbeixsael cassor-worssor mel gga ar-seir miardal dae eil ddei gierbox gger, Arbosobo ddei xi eil zzir leil caexr xiax gger arddeirnga a, Yiluxlsaler leil tiur a yar hher ggie bei lol su Arbosobo ddei ca eil ddei leil bei zil gger lol nia. Eil ddei mel, ngo Daxlliuxrsixl miardal a. Nialngasael bei ssi nia!” eine bbeix a.

### Arbosobo Ddei Xi Zzir Zi Box Teixl A

<sup>13</sup> Zzirmar Daxlliuxrsixl yaa leil eine miardal a, yel, Hexrxi ser ddei serzar Daxrnaer, Sixlta-Bosinaer nei yaa dax cir piar a bei su mel dder, jiuurjiu-maemae yar miardal dae mel bei ssi a. <sup>14</sup> Yirsaexllixl su ca leil guaxr su camar mel xiezi Hagai nei Yixldo ddei lilbol Sar-jialixlyar yaa leil Arbosobo ddei ddar mel biar gger a, yaa Arbosobo ddei xi zzir zi car, azo bei a lei yarzi bei seir. Yaa Arbosobo miardal dae mel dax zox dae nei Bosi goxrjia ddei zzirmar Julursixl, Daxlliuxrsixl nei Yaldaxrxuxi yaa miardal goxr mel dax zox dae a, Arbosobo ddei xi zzir zi teixl a. <sup>15</sup> Daxlliuxrsixl zzirmar bei qiuxl koxl hal cir koxl, Yaldaxrxiu gga ddeixso cir ni, Arbosobo ddei xi zzir zi box teixl gaxzi a.

<sup>16</sup> Yirsaexllixl su ca mel, Arbosobo leil zi su mel, Lixlweixl su ca mel, nei kebal mermi ssu mal si a yoxl jjixr lei Yirsaexllixl su ca maelmaerjjia lei, ggegge-sese a, Arbosobo ddei xi zzir Arbosobo leil gger jiax goxr. <sup>17</sup> Jiax eil ddei goxr a, yaa loxrbbex cirxiuler (100), yabol nrxiuler (200) nei yassor lixiuler (400) ho a, Arbosobo leil zi. Yoxl Yirsaexllixl su ca mel hormo cuxr zza mel dax zox dae a, acixlbol ceinirmo (12) ho a, Yirsaexllixl su ca mel ddei zuixl mel leil ssoxrsuxl lol a, Arbosobo leil ziddu bei. <sup>18</sup> Yaa halae Moxrxi lixfaxr leil dixl dae mel dax zox dae a, Arbosobo leil zi su mel leil nei Lixlweixl su ca mel leil miardal a, yaa azo bei zoxr ddei dax zox dae a, Yiluxlsaler zzi gga Arbosobo leil visser lol.

### Yuxlyuexl Jiax Goxr

<sup>19</sup> Guxlsixlxixu ceili (14) cir ni, kebal mermi ssu mal a yoxl jjixr lei su ca mel Yuxlyuexl jiax goxr. <sup>20</sup> Arbosobo leil zi su mel nei Lixl-

weixl su ca mel cirter a armael leil ggecir nei nixmox seibeix lol; sei-nr-beix lei ar ddei nr zza. Lixlweixl su ca mel, kebal mermi ssu si a yoxl jjixr lei su ca mel leil nei yaa ddei arzzi-nimar Arbosobo leil zi su mel leil, halae armael leil weix a Yuxlyuexl jiax goxrddu yassor seixl. <sup>21</sup> Kebal mermi ssu mal si a yoxl jjixr lei Yirsaexllixl su ca mel lei Arbosobo leil zi dae ya hor eilmel zzor; mermi eil ddei gga goxr dae, kebal hal mel leil zeixleixr nr zi Yirsaexllixl su ca mel ddei Arbosobo Yihexrhuaxr leil lar zi su, Yoxrtaexl su nr nga ca maelmaerjjia lei Arbosobo leil zi dae ya hor eilmel zzor. <sup>22</sup> Yihexrhuaxr mel yaa leil ggese lol, yoxl Yalsuxl goxrjia ddei zzirmar ddei nixmox zzar yaa leil seir lol a, yaa leil beijjiu a, Yirsaexllixl su ddei Arbosobo ddei xi zzir zi box lol. Yel yaa ggegge-sese a miljiazi ji nr goxr aba zzor jiax sir ni goxr a.

### Yirsila Yiluxlsaler Zzi Gga Ssi Ci

**7** <sup>1</sup> Eilmel goxr ho a, Bosi goxrjia ddei zzirmar Yaldaxrxuxi zzirmar bei dae car, Yirsila mi ca ar ddei zza. Yar mel Xilaexryar ddei ssor; Xilaexryar nael, Yalsarlixlyar ddei ssor; Yalsarlixlyar nael, Xilexljia ddei ssor; <sup>2</sup> Xilexljia nael, Sarloxr ddei ssor; Sarloxr nael, Sardu ddei ssor; Sardu nael, Yalxitu ddei ssor; <sup>3</sup> Yalxitu nael, Yalmarlixlyar ddei ssor; Yalmarlixlyar nael, Yalsarlixlyar ddei ssor; Yalsarlixlyar nael, Mirlayue ddei ssor; <sup>4</sup> Mirlayue nael, Xilaxiyar ddei ssor; Xilaxiyar nael, Wuxi ddei ssor; Wuxi nael, Buxlzi ddei ssor; <sup>5</sup> Buxlzi nael, Yalbirsu ddei ssor; Yalbirsu nael, Feinixrha ddei ssor; Feinixrha nael, Yirlixlyalsar ddei ssor; Yirlixlyalsar nael, Arbosobo leil zi su vaerzzirpor Yalluixr ddei ssor. <sup>6</sup> Babirluixr goxrjia gga ddeix jjixr lei su Yirsila eil ddei mel, Arbosobo ddei sul saexl su ca ar ddei a. Yar Yirsaexllixl su ddei Arbosobo Yihexrhuaxr Moxrxi leil gger lixfaxr mel leil saexl. Yar ddei Arbosobo Yihexrhuaxr yar leil beijjiu a, zzirmar ddei leil yar qiuxr dae haza ddarkoxl lol.

<sup>7</sup> Yaldaxrxuxi zzirmar bei sir koxl hal cir koxl, Yirsila Yirsaexllixl su ca ar cir dax cirgo a Babirliuxr goxrjia gga ddux lei a, Yiluxlsaler zzi gga jjixr. Ca eil cir gga mel, Arbosobo leil zi su, Lixlweixl su,

caxlgo caxl su, Arbosobo ddei xi zzir leil su su nei miar bei gger su lei ca dae. <sup>8</sup>Yaldaxrxuxi zzirmar bei sir koxl hal cir koxl ngor xiu gga, Yirsila Yiluxlsaler zzi gga ddeix ci a. <sup>9</sup>Guxlsixlxiu ddeix teixl ci ni, yar Babirluixr goxrjia gga ddux a. Yar ddei Arbosobo mel yar leil seir lol a, yar leil beiijiu dae a, yel yar Ngorxiu ddeix teixl leil dder Yiluxlsaler ddeix ci a. <sup>10</sup>Yirsila mel Yihexrhuaxr ddei lixfaxr mel leil seirseir a zza doxr nei lixfaxr mel dax bei mae dae xiar har a; yoxl lixfaxr nei miardal dae mel Yirsaexllixl su ca mel leil mul gger.

<sup>11</sup>Yirsila mel, Arbosobo leil zi su nei Arbosobo ddei sul saexl su a. Yar Yihexrhuaxr Yirsaexllixl su ca mel leil miardal dae mel leil nei lixfaxr mel leil yarzisael saexl. Yaxldaxrxuxi zzirmar yar miardal dae mel Yirsila leil xil vaexr gger a bbeix: <sup>12</sup>“Ngo mel zzirmar mel ddei zzirmar Yaldaxrxuxi a. Merlabbor hher dae Arbosobo ddei sul saexl su Arbosobo leil zi su Yirsila, ngo ni leil xil vaexr gger, ni leil zzaso lol nia! <sup>13</sup>Ngo ddei goxrjia gga goxr dae Yirsaexllixl su, halae Arbosobo leil zi su nei Lixlweixl su ha Yiluxlsaler zzi gga ddeix ggese su ca mel, ngo yaa leil ni dax cirgo a ssi lol. <sup>14</sup>Ngo nei ngo dax cirza-hanga zzubbe su ca sirler ni leil miardal a, ni leixrga gga Arbosobo ddei lixfaxr ddei dax zox dae a, Yoxrdaxl mermi nei Yiluxlsaler zzi ddei arsaesael nga dae bbe i ssi. <sup>15</sup>Ni yoxl ngo nei ngo dax cirza-hanga zzubbe su ca sirler armael ggegge-sese a, gger dae piu sae mel vei si a, Yiluxlsaler zzi gga hher dae Yirsaexllixl su ddei Arbosobo leil gger. <sup>16</sup>Halae ni Babirluixr cirser-lorbba gga se wo piu sae maelmaerjjia, nei cassor-worssor mel, halae Arbosobo leil zi su mel armael ho ggese a, Arbosobo ddei xi zzir leil ho dae zzaegu mel vei si. <sup>17</sup>Yel ni piu sae eimel sser a, nialngasael loxrbex, yabol, yassor, so nei puxrto zzubbaer vae a, Yiluxlsaler zzi gga nia ddei Arbosobo ddei xi gga Arbosobo leil zi ggie halmaex zi. <sup>18</sup>Nirzizei dae piu sae mel nael, ni ddei Arbosobo xiar dae mel dax zox dae a, ni nei ni ddei arzzi-nimar mel i dae a arsae seir dder arsae sser ddo. <sup>19</sup>Ni leil jia gger a ni ddei Arbosobo ddei xi gga sser labox zzaegu mel, ni Yiluxlsaler zzi gga Arbosobo meixsaer qir leil vei mal

ci nia. <sup>20</sup> Ni ddei Arbosobo ddei xi gga, zeixleixr zzirbae sser zoxr arddeirnga a, ni zzirmar ddei zzirbae ji ggie gga vei a sser ddo.

<sup>21</sup> Ngo Yaldaxrxuxi zzirmar yoxl Hexrxi ser gga zzirbae guaxr su vaervaerpor hazza leil miardal: ‘Merhhexr gga hher dae Arbosobo ddei lixfaxr mel leil yarzisael saexl Arbosobo leil zi su, Arbosobo ddei sul saexl su Yirsila nia dax azo li zzorbbeixlei, nia nialngasael bei gger nia, <sup>22</sup> hherdder piu sodu lixiu (3,400) goji, so cirmeir (10,000) goji, puxrto zzibbaer nrdu nrxiu (2,200) se, saercor ssuvi nrdu nrxiu (2,200) se zzezze gger ci ddo; cor nael hormo li zzorbbeixlei gger ddo. <sup>23</sup> Ha merhhexr gga hher dae Arbosobo miardal dae mel, nia yar ddei xi zzir leil seilseir a bei gger ssi nia. Nrnga a, yar ngo ddei goxr leil nei ngo ddei ssor mel ddei goxr mel leil seifu daxlgaxl faex leilei. <sup>24</sup> Ngo yoxl nia leil bbeix gger, nia Arbosobo leil zi su, Lixlweixl su ca, caxlgo caxl su, alddur su su nei Arbosobo ddei xi gga miar bei gger dae su ca mel dax suix se nr ddo.’

<sup>25</sup> Yirsila, ni, ni ddei Arbosobo ni leil olnolddu lol mel dax zox dae a, ni ddei Arbosobo ddei lixfaxr mel leil saexl su ca hazza leil vaervaerpor nei ca leil ser su bei lol a, Hexrxi ser ddei ca mel leil guaxr lol a, yaa leil Arbosobo ddei lixfaxr mel leil nr saexl su ca hazza leil mul gger lol. <sup>26</sup> Ha ni ddei Arbosobo ddei lixfaxr mel leil nei zzirmar miardal dae mel leil no-nr-ni su ca mel leil dder nialngasael yar leil zuixl dixl gger, bbeixsael seixl zil gger, bbeixsael kebal mermi ggaxr mal gger, bbeixsael yar ddei hazza su si, bbeixsael ge ji du lei nia,” eine bbeix a.

### Yirsila Yihexrhuaxr Leil Bbeix Zae Gger

<sup>27</sup> Yirsila bbeix: “Ngua ddei porpor mel ddei Arbosobo Yihexrhuaxr leil mel bbeix zae gger mibbe, yar mel zzirmar ddei leil nixmox zzar Yiluxlsaler zzi gga Yihexrhuaxr ddei xi zzir zi box xixl niazzir lol; <sup>28</sup> yoxl zzirmar nei zzirmar leil cirza-hanga xiar jjiu su ca mel meixsaer qir leil, halae zzirmar woxrke quexrlixl zza su vaervaerpor mel meixsaer qir leil ngo leil seir lol. Yihexrhuaxr ngo ddei Arbosobo ddei leixrhher zze ngo leil beijjiu a, ngo dder hhel du lei

a, Yirsaexllixl su ca mel gga vaervaerpor mel leil cirgo a ae pex du lei a, yaa ngo dax cirter a ddeix lei a,” eine bbeix a.

### Ssu Mal Ggie Jjixr Lei Su Ca

**8**<sup>1</sup> Yaldaxrxuxi zzirmar bei dae car a, ngo dax cirter a Babirluixr goxrjia cirdae a, Yiluxlsaler zzi gga ddeix lei su ca mel, yaa ddei cuxr ddei vaervaerpor mel leil nei yaa ddei porpor mel leil jiasibbor vaexr dae: <sup>2</sup> Feinixrha ddei giedae ca nael, Gexrsuixl; Yirtamar ddei giedae ca nael, Daxlyirlir; Daxlweixl ddei giedae ca nael, Hatu. <sup>3</sup> Baluxl ddei giedae ca, hherdder Sixljianixr ddei giedae ca nael, Sarjialixlyal; halae yar dax cir cuxr su capor cirxiu ngorceimo (150) zza. <sup>4</sup> Baha-Moxrya ddei giedae ca nael, Xilaxiyar ddei ssor Yirlixlyuenaer; yar dax ca dax dae capor mel nrxiuler (200) zza. <sup>5</sup> Sartur ddei giedae ca nael, Yarhaxi ddei ssor Sixljianixr; yar dax ca dax dae capor mel soxiuler (300) zza. <sup>6</sup> Yaldi ddei giedae ca nael, Yuenaxrda ddei ssor Yirbiexr; yar dax ca dax dae capor mel ngorceimo (50) zza. <sup>7</sup> Yirlaxr ddei giedae ca nael, Yaltalixlyar ddei ssor Yisaeyal; yar dax ca dax dae capor mel sirceimo (70) zza. <sup>8</sup> Sixlfartixryar ddei giedae ca nael, Mirjialexl ddei ssor Xibadixlyar; yar dax ca dax dae capor mel heixlceimo (80) zza. <sup>9</sup> Yueya ddei giedae ca nael, Yixie ddei ssor Exrbadiryal; yar dax ca dax dae capor mel nrxiu ceiheixller (218) zza. <sup>10</sup> Banixr ddei giedae ca nael, Yue-xixlfei ddei ssor Sixlloxrmixl; yar dax ca dax dae capor mel cirxiu qiuxlceimo (160) zza. <sup>11</sup> Birbaexl ddei giedae ca nael, Birbaexl ddei ssor Sarjialixlyal; yar dax ca dax dae capor mel nrzei heixller (28) zza. <sup>12</sup> Yajiaxr ddei giedae ca nael, Hajiatar ddei ssor Yuehanaxr; yar dax ca dax dae capor mel cirxiu ceimo (110) zza. <sup>13</sup> Yaldonixr-ga ddei giedae ca, hherdder laelae saelnei jjixr ci mel, yaa ddei mi mel mel: Yirlixlfarliexl, Yilixl nei Sixlmaryar, yaa dax ca dax dae capor mel qiuxlceimo (60) zza. <sup>14</sup> Birgexrwaryi ddei giedae ca nael, Wutaexl nei Sarbuxl; yaa dax ca dax dae capor mel sirceimo (70) zza.



Yirsila Lixlweixl Su Ca Nei Arbosobo Ddei Xi  
Gga Miar Bei Su Ca Mel Leil Ae Pex

<sup>15</sup> Ngo yaa leil Yalhawar dax pe mal lazzarmo hal zex qir dax ae pex du lei a, ngua halmaex gga so ni hher a. Nael ngo cassor-worssor nei Arbosobo leil zi su ca mel leil i a, Lixlweixl su ca mel halmaex hher ggie nr mia, <sup>16</sup> yel dder vaervaerpor Yirlixlyirxixl, Yalliexl, Sixlmaryar, Yirlixlnaxrda, Yarlixl, Yirlixlnaxrda, Naxrda, Sarjialixlyal, Mirsulaxr, halae sulmulsu Yueyarlixl nei Yirlixlnaxrda leil ae si lei a. <sup>17</sup> Ngo yaa leil miardal a, Jiaxifeiryar mermi ssi a halmaex gga ddei vaervaerpor Yixldo leil i ssi lol, yoxl yaa leil Yixldo leil nei yar ddei cirssor Arbosobo ddei xi gga miar bei gger su mel leil bbeix gger labox ddar mel bbeix gger a, ngua ddei Arbosobo ddei xi gga miar bei gger su ca hier gger si lei lol. <sup>18</sup> Ngua ddei Arbosobo ngua leil seir lol a, ngua leil beijjiu a, yaa ngua leil yarzi olnolddu ca Sixllixlbir, halae yar ddei arzzi-nimar nei ssor maelmaer a ca ceiheixlmo (18) hier mal gger lei a. Sixllixlbir mel Yirsaexllixl ddei ssor Lixlweixl ddei lilbol Moxrlixl ddei giedae ca a. <sup>19</sup> Yaa yoxl Hasabir-yar nei Mirlalixl ddei giedae ca Yisaeyal, halae yaa ddei arzzi-nimar nei ssor maelmaer a nrzeimo (20) leil hier si lei a. <sup>20</sup> Kebal, yoxl Arbosobo ddei xi gga miar bei gger su nrxiu nrzeimo (220) zza. Ca eilmel ddei porpor mel mel, zzirmar Daxlweixl nei yar woxrke vaervaerpor mel miardal a Lixlweixl su ca mel leil beijjiu lol mel nga a. Yaa ddei mi mel cirddei-cirddei sul mel leil vaexr deix dae.

Yirsila Cassor-worssor Mel Leil Hier Dae A,  
Almeixr Nr Zzor Arbosobo Dax Ddar Biar

<sup>21</sup> Giedae ngo Yalhawar lazzarmo dax, ca mel leil miardal a, almeixr nr zzor, ngua ddei Arbosobo meixsaer qir leil nr col lol; yar leil qiuxr a, jjiumo cir zex gga ngua leil hier dae lol, ngua nei ngua ddei ssormine mel leil, halae ngua ddei cirza-hanga leil guaxr dae lol. <sup>22</sup> Halleix ngo mel zzirmar ddei dax: “Ngua ddei Arbosobo yar leil zo a yar leil qiuxr su ca cirddei-hanga leil seir lol a, yaa leil beijjiu. Nael yar leil nr li su ca maelmaerjjia leil nael, yar dder seifu

faex a yaa leil faxr,” eine bbeix goxr a. Yel ngo zzirdae a, zzirmar leil jjiimo ssi su meixr nei murzzaersu meixr mel leil miardal si leil a ngua leil beijjiu lei lol la qiuxr a mel, seixldaddo arddeir a. <sup>23</sup> Yel ngua almeixr lei nr zzor ngua ddei Arbosobo leil qiuxr a, yar dder ngua qiuxr dae mel leil noni a.

### Arbosobo Ddei Xi Leil Ho Dae Zzaegu Mel

<sup>24</sup> Ngo Arbosobo leil zi su vaervaerpor ceinirmo, hherdder Sixllixl-bir, Hasabiryar nei yaa ddei arzzi-nimar ceimo leil tiur teixl lei a, <sup>25</sup> zzirmar nei zzirmar dax cirza-hanga zzibbe su ca mel, vaervaerpor mel, halae halmaex hher dae Yirsaexllixl su ca maelmaerjgia ngua ddei Arbosobo ddei xi leil ho dae piu, sae nei sser labox zzaegu mel cex a yaa leil jia gger a. <sup>26</sup> Ngo cex a yaa leixrga gga jia ji gger mel gga: piu nrzeinir (22) dui zza, piu bei teixl lei zzaegu sodu lixiu (3,400) dui zza, sae sodu lixiu (3,400) goji zza. <sup>27</sup> Sae baxlaxr nrzei (20) peixl zza, cex a mel heixl goji peix zza; sae baxlaxr sael a perniar naxrcixlcixlmo zzir baxlaxr nr peixl zza. <sup>28</sup> Ngo yaa leil bbeix: "Nia nei zzaegu eilmel leil bbe teixl lei a, Yihexrhuaxr leil gger a. Piu sae mel mel armael gger ggese a, nia porpor ddei Arbosobo Yihexrhuaxr leil ho dae mel nga a. <sup>29</sup> Nia zabbar-seilseir a eilmel leil guaxr dae nia, nia Yiluxlsaler Yihexrhuaxr ddei xi gga zzaegu ji ggie, Arbosobo leil zi su vaervaerpor, Lixlweixl su ddei vaervaerpor nei Yirsaexllixl su circuxr-hanga ddei vaervaerpor mel meixsaer qir leil cex ho hane zzeze ci nia,” eine bbeix a. <sup>30</sup> Yel, Arbosobo leil zi su mel nei Lixlweixl su ca mel cex goxr piu sae nei sser labox zzaegu mel zzi gel lei a, Yiluxlsaler zzi gga ngua ddei Arbosobo ddei xi gga vei mal.

### Yiluxlsaler Zzi Gga Jjixr Ci

<sup>31</sup> Guxlsixlxixiu ceinir cir ni, ngua Yalhawar lazzarmo qir leil nr hher, Yiluxlsaler zzi gga ssi. Ngua ddei Arbosobo ngua dax hher dax dae a, jjiimo cir zex gga ngua leil guaxr dae a, ngua leil dir su ca mel leixrga gga nei jjiimo car a gga neix dae su ca mel leixrga gga ngua leil jiuxl teixl lei. <sup>32</sup> Ngua Yiluxlsaler zzi gga ssi ci a, halmaex gga so

ni hher a. <sup>33</sup> Li ni cir ni, ngua dder Arbosobo ddei xi gga ssi a, piu, sae nei sser labox zzaegu mel cex a, Vulixlyal ddei ssor Arbosobo leil zi su Mirlixlmoxl leil jia gger a. Feinixrha ddei ssor Yirlixlyalsar, Lixlweixl su ca Yisuyal ddei ssor Yuesarboxr nei Birneixl ddei ssor Noxryaldir lei yar dax hher dax dae. <sup>34</sup> Ciryoxr-hanga lei hhe goxr, cex goxr, halae hormo zza lei sul leil vaexr deix dae a.

<sup>35</sup> Kebal mermi ssu mal si a jjixr lei su ca mel adoxl gga cu a ziddu mel Yirsaexllixl su ddei Arbosobo leil zi. Yaa Yirsaexllixl su ca maelmaerjjia leil weix a, loxrbbexmar ceinirmo (12), yabol gecei qiuxller (96), yassor sircei sirlar (77) zi; yoxl zuixl ssoxrsuxl labox acixlbol ceinirmo (12) zi. Eilmel maelmaerjjia lei adoxl gga cu a, ziddu bei a Yihexrhuaxr leil zi. <sup>36</sup> Yaa yoxl zzirmar miardal dae mel vaexr deix dae zul Hexrxi ser ddei serzar nei vaervaerpor leil jia gger a. Serzar nei vaervaerpor mel dder cassor-worssor mel leil beijjiu, yoxl Arbosobo ddei xi gga miar mel beijjiu.

### Kebal Su Dax Jixrhui Su Ca Mel Leil Bota

**9** <sup>1</sup> Eilmel bei jjia ho a, vaervaerpor mel lei a, ngo leil bbeix gger a bbeix: “Yirsaexllixl su ca mel, Arbosobo leil zi su ca mel nei Lixlweixl su ca mel mel, halae mermi hal ddei gga goxr dae Jianaxr su ca, Hexl su ca, Birlixlsir su ca, Yibuxlsi su ca, Yalme su ca, Moxrya su ca, Aezixr su ca, Yalmoxrlixl su ca mel dax bbe nr kae seir. Yaa goxrjia eilmel gga ca mel dax bei mae a, yarzi vuxryixr ddo hal mel bei. <sup>2</sup> Yaa mel ca eilmel ddei ssormaer mel gga armael leil nei armael ddei ssor mel leil maerssor bbeix gger a, Arbosobo bbe teixl lei ca cuxr leil halmaex su ca mel dax hherxiux dae lol. Vaervaerpor mel nei ca leil guaxr su mel, eine bei su ca mel gga zuixl neixl zzir ca mel nga a.” <sup>3</sup> Ngo eilmel leil bbejjiur a qie, kukurzzar pia xiux nei teixlsibbor pia xiux si bbaer gger, olce nei bborvu mel zix teixl gger a, gexr zzae gexr, cix zzae cix, cux dae a. <sup>4</sup> Yirsaexllixl su ca mel ddei Arbosobo mel, kebal mermi ssu mal a yoxl jjixr lei su ca mel bei dae zuixl mel leil faxr nia eine bbeix goxr a; yel ha ddar eilmel leil bbejjiur a, ssurssulssur gexr su ca mel dder ngo dax lei a, hher

pex du lei a. Ngo gexr zzae gexr cix zzae cix halmaex gga cux doxr dae a, eilmerxixl Arbosobo leil zi zi ci halcar zzeze ci a.

<sup>5</sup> Eilmerxixl Arbosobo leil zi zi ci halcar a, ngo cix zildu a ha du lei a, si bbaer dae kukurzzar pia xiux nei teixlsibbor pia xiux veixr dae a, cizixl gger dae a, leixrhher zze bil du lei a, ngo ddei Arbosobo Yihexrhuaxr dax ddar biar a, <sup>6</sup> bbeix: “Ngo ddei Arbosobo, ngo yarzi yixrsixr nr zza, ngo ni meixsaer qir leil oldde taex bil du lei nr bel; ngua ddei zuixl mel yarzi neixl, ngua ddei zuixl mel yarzi miur.

<sup>7</sup> Ngua ddei porpor mel cirdae a eilni zzeze ci a lei, ngua ddei zuixl mel yarzi neixl. Ngua zuixl bei a, ngua nei ngua ddei zzirmar, halae ni leil zi su mel lei kebal goxrjia ddei zzirmar mel leixrga gga hher ji dae a, yaa ngua leil seixl zil gger, ssu si, su si, seixlda lol, hherdder eilni goxr dae mel sael a nga. <sup>8</sup> Nael ngua ddei Arbosobo Yihexrhuaxr, ni ngua leil arleixr seir lol a, ngua zza dae seir ca mel leil zebol mu ggie pato wo lol a, zzasoso a ni bbe teixl lei middei ddei gga goxr dae lol. Ni ngua leil meixddur zze bbele lol, ngua zebol mu dae car a, ngua leil gol zei lei lol. <sup>9</sup> Ngua mel zebol lar nga; nael ngua zebol mu dae car, ngua ddei Arbosobo ni ngua dax bbe nr kae. Ni Bosi zzirmar mel leil ngua leil seir lol a, ngua leil gol zei lei lol a, ni ddei xi bei xiaxr ho zzir zi box cexr lol; ngua leil Yoxrdaxl mermi nei Yiluxlsaler zzi gga zzasoso a nga lol.

<sup>10</sup> “Ngua ddei Arbosobo, eine nga a mel, ngua halae azo ddar bbeix ddu zza seir bbeixleir? Ngua mel ni miardal dae mel leil no-nr-ni, <sup>11</sup> hherdder ni, ni leil visser su xiezi mel leil sser dae a miardal a bbeix: ‘Nia ssi a, li ssi nia middei hal ddei mel sei-nr-beix ar ddei a; mermi eil ddei gga goxr dae su ca mel yarzi vuxryixrddo bei dae zuixl hal mel cirmaex-hanga lei sei-nr-beix lol ho a. <sup>12</sup> Yel nia ddei ssormaer mel yaa ddei ssor mel leil fu gger nr ddo, nia ddei ssor mel leil lei yaa ddei ssormaer mel leil bbeix lol nr ddo, yaa leil zzasoso nei seirggiebbær xiar gger nr ddo. Eine nga a, nia dder sexr a, middei eil ddei gga dae teixl lei mel zzor cexr, halae middei hal ddei nia ddei lilbol-lilmo mel leil gger a arddolcar a ci a lei yaa ddei bei lol,’ eine bbeix a. <sup>13</sup> Ngua yarzi gexrddo nei zuixl larhorhormo bei a, cirza-hanga eilmel ngua leil ddeix bbeixarnar, nael ni ngua

leil faxr dae mel bir ngua leil faxr mibbe mel leil hormo la leixl; ni halae ngua leil seir lol a, ngua leil gol zeil lol. <sup>14</sup> Ngua arsae zeixleixr ni miardal dae mel leil no-nr-ni, yarzi vuxryixrddo bei su ca hal mel dax jixrhui ddo bbeixleir? Ngua eine bei arddeirnga a, ni arsae bei lei seifu faex a, ngua leil bei zil gger a, ngua leil ca cir ddei lei zza dae lol nr var. <sup>15</sup> Yirsaexllixl su ddei Arbosobo Yihexrhuaxr, ni mel bbaehhex, yel ngua eilni zza dae ca eilmel saelnei gol dae cexr. I ddo a! Ngua ni meixsaer qir leil zuixl bbeix zuixl a nga, yel ni meixsaer qir leil ngier ver xie su ca lei ar ddei nr zza,” eine bbeix a.

### Kebal Cuxr Dax Jixr-nr-hui Lol

**10** <sup>1</sup> Yirsila Arbosobo ddei xi zzir xilmeir middur leil puxr gex dae a, Arbosobo dax ddar biar, zuixl cexrssexl, nge dae car a, Yirsaexllixl su capor ssormaer nei aniux cirke a yar dax halmaex lei a hher pex du lei a, yar dax cirgo a daxlgaxl-daxllixl nge. <sup>2</sup> Yirlaxr ddei lilbol, Yixie ddei ssor Sixljianixr Yirsila leil bbeix: “Ngua middei eil ddei gga kebal mermi su ca mel ddei ssormaer mel leil bbeix a maerssor bei lol a, ngua ddei Arbosobo leil de dae a; nael Yirsaexllixl su ca mel halae i ngexl ggie zza seir. <sup>3</sup> Eilcar ngua Arbosobo dax bbeix har zaxr nia. Ngua, ni nei Arbosobo miardal dae mel leil i du su ca hal mel quex dae ddar mel leil noni nia, Arbosobo ddei lixfaxr mel dax zox dae a bei mae dae nia. Yel ngua kebal mermi bbeix si lei maerssor mel leil nei yaa ddei aniux mel leil ho xixl nia. <sup>4</sup> Ni ha du la, eil ddei mel ni bei labox ddei nga a; ngua arsae bei lei ni leil beijjiu nia, yel ni nixmox vaervaermo bei ssi ddo a,” eine bbeix a. <sup>5</sup> Yirsila dder ha du lei a, Arbosobo leil zi su vaervaerpor, Lixlweixl su ca nei Yirsaexllixl su ca maelmaerjjia leil ddar eilmel dax zox dae a bei nia bbeix har zaxr lol a. Yaa dder bbeix har zaxr a.

<sup>6</sup> Yirsila Arbosobo ddei xi zzir xilmeir leil ha du lei a, Yirlixlyalsixr ddei ssor Yuehanaxr ddei xi gga ddir. Yar halmaex hher dae car, yar kebal mermi ssu mal a jjixr lei su ca mel zuixl bei dae mel leil weix a cix a, yel almeixr lei nr zzor, ajjix lei nr dda. <sup>7</sup> Yaa Yoxrdaxl

mermi su nei Yiluxlsaler zzi gga su kebal mermi ssu mal a yoxl jjixr lei su ca mel leil bbeix gger a, yaa leil Yiluxlsaler zzi gga cirgo a hher pex du lei lol. <sup>8</sup> Ha vaervaerpor mel nei Yirsaexllixl su ca mel leil guaxr su camar mel cirgo a bbeix har zaxr dae mel dax zox dae a, so ni gga nr lei su ca mel ddei zzaegu nei zzirbae maelmaerjjia dder vei si nia. Yar ca ddei leil lei kebal mermi ssu mal a, yoxl jjixr lei su ca mel hher pex ggie nr hher lol, ggaxr pixl gger nia.

<sup>9</sup> Yel, Yoxrdaxl su ca mel nei Bixlyarmir su ca maelmaerjjia lei so ni gga Yiluxlsaler ssi ci a hher pex du lei a. Hal cir ni mel jiajia Ge-xiu nrzei cir ni malmal nga a. Ca maelmaerjjia lei Arbosobo ddei xi zzir xilmeir kuax ggie cux dae; eilmel eine nga, yoxl almer lei daxl-gaxl lei a, yel ca maelmaerjjia lei gexr a lixlix-laexlaex go dae a.

<sup>10</sup> Arbosobo leil zi su Yirsila ngier du lei a, yaa leil bbeix: “Nia kebal mermi su ssormaer mel leil bbeix si lei a nia ddei maerssor bei lol a, Yirsaexllixl su ca mel leil zuixl neixl dax lol a; yel nia zuixl zza a. <sup>11</sup> Eilcar, nia, nia porpor ddei Arbosobo Yihexrhuaxr dax zuixl ssexl nia, yar ggese dae mel dax bei mae nia, middei eilmaex gga ca mel dax nei nia kebal mermi bbeix si lei maerssor mel dax bbe kae nia,” eine bbeix a. <sup>12</sup> Ca maelmaerjjia lei worcixl-worni ddar-koxl a bbeix: “Ngua arsae bei lei ni ddei ddar mel dax zox dae a bei.

<sup>13</sup> Nael ca mel yarzi miur, yoxl almer vaervaer lei zi a; niul yilzi a eilbbaer ngier doxr dae nr cexr. Ngua mel zuixl yarzi larhor bei a, yel eil ddei cir nr ni bei jjia ddo nr nga. <sup>14</sup> Ngua ddei vaervaerpor mel leil miar eil jji bei lol. Kebal mermi su ssormaer mel leil bbeix a maerssor bei lol su ca maelmaerjjia leil, nixixl dixl dae ddei gga yaa ddei zzi ddei gga vaervaerpor mel dax nei ca leil ser su mel dax cirgo a lei lol a, miar eil jji bei jjia a, Arbosobo niul dax seifu nr faex eine zzeze ci,” eine bbeix a. <sup>15</sup> Yalsarhei ddei ssor Yuenaxrda nei Texlwar ddei ssor Yarhaxixl yaa nnel lar eilmel leil dir. Halae Mirsulaxr nei Lixlweixl su ca Sabirtaexl yaa leil beijjiu.

<sup>16</sup> Kebal mermi ssu mal si a jjixr lei ca mel eilmel sael a bei a. Arbosobo leil zi su Yirsila dder jiacuxr mel ddei vaervaerpor mel leil tiur teixl lei a, yaa ddei mi mel vaexr zei lei a. Ceixiu ddeix teixl cir ni, ca eilmel cirgo a hher dae a miar eil jji bei. <sup>17</sup> Guxlsixlxixiu ddeix

teixl cir ni ci a saelnei, kebal mermi su ssormaer mel leil bbeix su ca mel leil caxr teixl jjia lei.

### Kebal Mermi Su Ssormaer Mel Leil Bbeix Su Ca Mel

<sup>18</sup> Arbosobo leil zi su ca mel gga, kebal su ssormaer mel leil bbeix a maerssor bei lol su ca mel hherdder: Yisuyal ddei giedae ca Yue-saxldaxr ddei ssor nei yar ddei arzzi-nimar Marxiyar, Yirlixlyirxixl, Yarlaxl nei Zidaxllixl nga a. <sup>19</sup> Yaa, yaa maerssor mel leil nr li ddarkoxl a. Yaa mel zuixl bei a, yel dder Arbosobo leil yabol ar ddei seixl zi a zuixl mel ssoxrsuxl lol. <sup>20</sup> Yimaexl ddei giedae ca mel gga: Hanaxrnixr, Xibadixlyar. <sup>21</sup> Halixr ddei giedae ca mel gga: Marxiyar, Yirlixlyar, Sixlmaryar, Yixie, Wuxiyar. <sup>22</sup> Basifuxl'aer ddei giedae ca mel gga: Yirlixlyuenaer, Marxiyar, Yirsirmarlixl, Nartaryixl, Yuesarbar, Yirlixlyalsar. <sup>23</sup> Lixlweixl su ca mel gga: Yuesarbar, Sixlmeir, Zilayar (yoxl Zilixlta ae), Birtaxiyar, Yoxrdaxl, Yirlixlyirxixl. <sup>24</sup> Caxlgo caxl su ca mel gga: Yirlixlyalsixr. Arbosobo ddei xizzir leil su su ca mel gga: Sarloxr, Tixrlixr, Wulixl. <sup>25</sup> Yirsaexllixl su ca Baluxl giedae ca mel gga: Lamir, Yisiyar, Marziyar, Miryarmixr, Yirlixlyalsar, Marziyar, Birnaryar. <sup>26</sup> Yirlaxr ddei giedae ca mel gga: Martanixr, Sarjialixlyal, Yixie, Yadir, Yilixlmoxl, Yirlixlyar. <sup>27</sup> Sartur ddei giedae ca mel gga: Yirlixlyuenaer, Yirlixlyalsixr, Martanixr, Yilixlmoxl, Sarbar, Yalxisar. <sup>28</sup> Birbaexl ddei giedae ca mel gga: Yuehanaxr, Hanaxrnixryar, Saxlbaexl, Yallexl. <sup>29</sup> Banixr ddei giedae ca mel gga: Mirsulaxr, Marluxl, Yaldaxlyar, Yarsuxl, Sixlya, Yilixlmoxl. <sup>30</sup> Baha-Moxrya ddei giedae ca mel gga: Adirnaxr, Zila, Birnaxryar, Marxiyar, Martanixr, Birsarlaxl, Birneixl, Marnaxrsi. <sup>31</sup> Halixr ddei giedae ca mel gga: Yirlixlyirxixl, Yisixlyar, Marziyar, Sixlmaryar, Ximiexl, <sup>32</sup> Bixlyarmir, Marluxl, Sixlmarlixlyar. <sup>33</sup> Hasuixl ddei giedae ca mel gga: Martexlnaer, Mardaxrta, Sarbar, Yirlixlfarliexl, Yilixlmaer, Marnaxrsi, Sixlmeir. <sup>34</sup> Banixr ddei giedae ca mel gga: Mardaexl, Axllaxr, Wuyixl, <sup>35</sup> Birnaxryar, Birdiryar, Ziluxl, <sup>36</sup> Warnixryar, Mirlixlmoxl, Yirlixlyalsixr, <sup>37</sup> Martanixr, Martexlnaer, Yarsar. <sup>38</sup> Banixr, Birneixl, Sixlmeir, <sup>39</sup> Sixllixlmiryar, Naxrda, Yaldaxlyar, <sup>40</sup> Marnaxrdirbaexl, Sasaexl, Salaexl,

<sup>41</sup> Yalsaxllixl, Sixllixlmiryar, Sixlmarlixlyar, <sup>42</sup> Sarloxr, Yalmarlixlyar, Yuesaexl. <sup>43</sup> Nixrbo ddei giedae ca mel gga: Yilixl, Martatixryar, Sarbar, Xibirnaxr, Yardaexl, Yue'aer, Birnaxryar nga a. <sup>44</sup> Ca eilmel maelmaerjjia lei kebal mermi su ssormaer mel leil bbeix a maerssor bei lol. Ca eilmel gga mel, aniux hier wo su ar mel zza a.